

Ntja ya Akani

E ngotswe ke Baeletsi Tsatsi | Ditshwantsho ka Manu Kongolo

Ha Mopresidente wa Afrika Borwa a tsebisa hore naha e tla kwallwa nako e itseng. Batswadi ba Akani ba ile ba tseba hore o tla tshwarwa ke bodutu hae. Sekolong, Akani o ne a bapala le metswalle ya hae; o ne a ithuta mantswe a matjha le ho ngola le ho bala dipalo ho titjhere ya hae. Batswadi ba Akani ba ile ba nahana leqheka la hore a dule a thabile: ba ile ba mmatlela ntja.

“O tla rea ntjanyana ya hao lebitso lefe?” ha botsa mme wa Akani.

“Ha ke eso tsebe hantle,” Akani a araba.



Ka letsatsi la pele la mokwallo, Akani le ntja ya hae ba qala ho bapalla jareteng, ba matha ho fihlela Akani a fellwa ke moya. Yaba mme ba dula ka phaposing ya Akani ya ho robala. Ha ba le fenstereng ba ne ba kgona ho bona ditora tsa seteishene sa motlakase hole mane. Ditora tseo di ne di pentilwe ka mebala e kganyang.

Ntja ya qala ho tsetsela mme Akani a e pholla ha bonolo. Yaba e qala ho tsoka mohatla ka thabo e kgolo. Akani a botsa, “Ke eng jwale, ntja?”



Na o ka kgolwa? Ntja ya araba ka lentswe le tebileng!
“Mehleeng ya kgale ...”

Akani a nahana hore o se a hlanya. A inamela ho ntja. “O itseng?”

Ntja ya kgohlela ho bula qoqotho. “Ke re mehleeng ya kgale,” ntja ya pheta hape, e shebile lehlakoreng la ditora tsane. Akani a mamela ka hloko ha ntja e qala ho pheta pale ya yona.

“Ka borwa ho Johannesburg ho ne ho ena le ditora tse pedi tse telele. Di ne di kgethehile. Ke bolela hore, di kgethehile e le ka nnete. E ne e le ditora tse phodisang bakeng sa Seteishene sa Motlakase sa Orlando ho fihlela ka selemo sa 1998. Yaba ba di fetola ho ba ditora tsa dipale tseo e neng e le tsa Soweto yohle: Ditora tsa Soweto. Dipale di ne di pentilwe ka ditshwantsho hohle ho di potoloha. Ditshwantsho di ne di fetoha nako le nako. Ka nako e nngwe dipale tse phetwang e ne le tsa Nelson Mandela, mohale e moholo wa setjhaba. Ka nako e nngwe di ne di pheta dipale ka mmimo le batho ba tantshang haholo. Ka nako e nngwe di ne di pheta dipale tse mabapi le Johannesburg, Toropo ya Kgauta,” ntja ya rialo.

Akani o ne a tletse nyakallo e kgolo mme a botsa ntja ka ho otloloha: “Na o ntja ya meijiki?” Ntja ya atamela ho Akani, ya mo nyeka marama a borethenyana ana mme ya tsheha setsheho sa dintja.



“Ke ntja e phetang dipale,” ntja ya rialo.

Akani o ne a thabile haholo mme a tlola betheng mme a etsa motantsho wa tlhoho. Ntja ya mo shebella, e tsoka mohatla wa yona kwana le kwana, kwana le kwana. Akani a dula fatshe hape.

“Ao, ntjanyana, na o ka mphetela pale e nngwe hape?” a kopa.

“O lokela ho nketsetsa ho hong pele,” ntja ya araba.

“Eng kapa eng,” Akani a tshepisa. “Mpolelle feela hore ke etse eng.”

“O tlameha ho mpha lebitso,” ntja ya araba.

Akani a sheba ka ntle ho fenstere a kgutsitse nakwana. Mme yare ha a bona ditora hole mane, a fumana mohopolo.

“Orlando,” Akani a rialo, a shebile hore ebe ntja e tla rata lebitso la yona le letjha na. Ntja ya se ke ya re letho nakwana. Mme ya tlola ya theo ha betheng, ya bohola ke thabo e bina ha monate, ya etsa se kang tantshi ya tlhoho. E ne e rata lebitso la yona.

“Orlando,” Akani a rialo. “Ke kopa o mphetele pale.”

“Mehleng ya kgale...” Orlando ya rialo, ya palama betheng ho dula pela Akani.

Ntja ya Akani

E ngotswe ke Baeletsi Tsatsi • Ditshwantsho ka Manu Kongolo

Mehopolo eo le ka buang ka yona

Na dintja di na le puo? Haeba ho se jwalo, dintja di buisana jwang?

O hopolang mabapi le lekgetlo la pele ha naha ya rona e qala ho kwalwa? Ke mofuta ofe wa dintho tseo o neng o di etsa ka nako ya ha naha e kwetswe?



Setshwantsho

Taka setshwantsho sa Akani le Orlando ba bapala mmoho ka serapeng.



Ho bala

Eba lefokisi la pale! Fumana mantswe paleng a o jwetsang hore:

- ★ kamore ya Akani e na le fenstere
- ★ Akani o ne a le mosa ho ntja ya hae
- ★ o na le thahasello paleng eo ntja ya hae e mo qoqelang yona
- ★ o reheletse ntjha ya hae ka Soweto Towers.




Ho ngola

Thusa Akani hore a se ke a qetwa ke bodutu nakong ya ho kwalwa ha naha. Ngola lenane la Diphetiso tsa Bodutu kapa ditlhahiso tsa ka moo a ka lulang a phathahane lapeng.



Mosebetsi wa matsoho

Iketsetse tora ya hao ya pale. Fumana lebokose la khateboto le lelelele le pampiri e lekaneng ho le kwahela mahlakoreng ohle a mane. Taka kapa penta setshwantsho sa pale pampiring. Kgomaretsa setshwantsho sa pale ya hao mahlakoreng a lebokose la khateboto.



Tshebetso

Qetella pale eo Orlando a qalang ho e pheta qetellong ya pale ya *Ntja ya Akani*.

